

Kalaallit Nunaanni pinerluttulerinermik inatsimmik aamma Kalaallit Nunaanni eqqartuussisarnermik inatsimmik allannguineq pillugu inatsisissatut siunnersuut (Covid 19-imik il.il. tunillaassuunnerit pinaveersaartinniarlugit akiorniarlugillu iliuusissanik atorunnaarsitsinissaq pillugu immikkut piunasaqaatit atorunnaarsinneqarnissaannut aalajangersakkap atorunnaarsinneqarnera) pillugu Inatsisartut aalajangiiffigisassaattut siunnersuut.

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Saqqummiussissut

(Ineqarnermut, Attaveqarnermut, Aatsitassanut, Inatsisit Atuutsinneqarneranut Naligiissitaanermullu Naalakkersuisoq)

Siullermeerneqarnera

Ukiumi qaangiuttumi tataannaqisumik Coronamik nunarsuaq tamakkerlugu tunillaassuuttoqarnera misigaarput, tamannalu silarsuami inuppassuit inuunerannik akeqarsimavoq. Taamaattumik nalinginnaasumik ulluinnarni inuunitta killilersuiffigineqarnera aamma illoqarfiit nunallu akornanni aporfeqanngitsumik angalasinnaanitta killilersuiffigineqarnera Coronap kingunerunerisimavaa. Nunanut allanut amerlasuunut naleqqiullugu qujanartumik pitsaanerusumik ingerlasimavugut, tamannalu pingaarnertut qanoq iliornissamat piareersaatit pisariaqartinneqartut Naalakkersuisut aalajangiiffigisimammattigit kiisalu pisariaqartinneqartunik inatsisiliorsimammata taamaattoqarneranut pissutaavoq.

Suliassaqarfinnut suli tiguneqarsimanngitsunut, matumani ingammik inatsisinik atuutsitsinermut suliassaqarfik ilanngullugu, nunarsuaq tamakkerlugu tunillaassuuttoqarnera pissutigalugu pitsaaliuineq tuniluunnerullu kigaallatsinneqarnissaa pillugu inatsisiliornissamik pisariaqartitsisoqarsimavortaaq.

Taamaallitutik Kalaallit Nunanni eqqartuussisarnermik inatsimmik allannguineq pillugu inatsisissatut siunnersuutip (Covid-19-imik il.il. tunillaassuunnerit pinaveersaartinniarlugit akiorniarlugillu iliuuseqarnerit) akuersissutigineqarnissaa pillugu oqaaseqaammik qallunaat naalakkersuisuinut nalunaaruteqarnissamik 13. maj 2020 Naalakkersuisut akuersissuteqarput.

Inatsisissatut siunnersuut 25. juni 2020 Folketingimi akuersissutigineqarpoq, aamma pisortat privatillu pisortanut tunngatillugu pisussaaffii pillugit avaqqutsisoqarsinnaanera pillugu Justitsministereqarfiup malittarisassanik aalajangersaasinnaanissamik piginnaatinneqarnissaa, inatsimmik allannguinerup kinguneraa.

Ingammik pinerluttulerinermi inatsisip aamma eqqartuussisarnermik inatsisip suliassaqarfiinut, nappaatit tunillaassortut pillugit qallunaat inatsisaanni Folketingimi inatsisissatut siunnersuutip saqqummiunneqarnerani akuersissutigineqarneranilu § 12 d, imm. 3-imi oqaasertaliunneqartut, Kalaallit Nunaannut nuunneqarnissaat inatsisip siunertaraa.

Kalaallit Nunaanni Justitsministereqarfiup suliassaqarfii, covid-19-ip sapinngisat tamaasa atorlugit siaruariartoqqinnissaata pitsaaliornissaanut akiorneqarnissaanullu, assersuutigalugu pinerluttunik isumaginnittut, pisariaqartinneqartunik sakkussaqaarnissaat matumuuna qulakkeerneqassaaq. Tamatuma peqatigisaanik Kalaallit Nunaannut inatsisit naleqqussarneqarnerisa pinissaat qulakkeerneqassaaq.

Inatsit 2021-imi 31. decembari atorunnaarsinneqassasoq inatsisip § 4, imm. 2-ani takuneqarsinnaavoq.

Kalaallit Nunaanni covid-19-ip nappaatillu allat nalinginnaasumik navianaatillit sapinngisat tamaat pitsaaliorneqarnissaat akiorneqarnissaallu pillugu Kalaallit Nunaanni naalagaaffiup oqartussaaffiisa aamma siunissami pisariaqartinneqartunik sakkooqarnissaat qulakkeerniarlugu, atorunnaarsitsinissamik immikkut piumasaqaatip atorunnaarsinneqarnissaa taamaammat siunnersuutigineqarpoq. Taamaaliornikkut assersuutigalugu inissiisarfinni pulaartarnerit anisarnerillu pillugit aamma 2021-imi decembarip 31-ata kingorna, inatsisunik atuutsitsinermut ministerip aalajangersakkanik aalajangersaasinnaanera qulakkeerneqassaaq.

Kalaallit Nunaanni Justitsministereqarfiup suliassaqarfiini inatsisiliornerup Kalaallit Nunaanni nappaatit tunillaassortut pillugit inatsimmut tapertaanissaa siunertarineqarpoq, taannalu Kalaallit Nunaanni aqqissuussinermut pitsaanerpaamik aamma Namminersorlutik Oqartussat suliniutaannut aallartissimasunut naleqquttuunissaa anguniarlugu ilusilerneqarpoq.

Naalakkersuisut taamatut oqaaseqarlutik Inatsisartuni immikkoortoq oqallisigineqartussanngorlugu tunniuppaat.